

金陵百詠



金陵百詠

于廷榮署

光緒癸卯冬

長沙葉氏刊

金陵百詠敘

曾景建金陵百詠 四庫箸錄爲浙江鮑士棊家藏本而外間傳本絕少此據翰林院典籍廳鈔本付刊蓋卽四庫底本名題百詠實止九十一首蓋傳鈔不無遺漏耳四庫提要所稱決囚燈一首誤言巖續被殺及中主誤作後主嘗見宋韋居安梅磻詩話亦摘其誤較提要所言更詳是其誤用故事亦不必曲爲之諱然韋氏又据其詠樂官山詩疑史稱宋征江南不妄殺一人未免失實則曾詩在宋時卽相引重可據以訂正史傳聞之誣韋又言蔣帝廟詩青骨二字人多不解偶閱海錄碎事載後漢末蔣子文嘗爲秣陵尉自謂青骨死當爲神後因靈顯吳主爲立祠鍾山下因改山爲蔣山後累封爲帝始知二字本此然則曾詩援據博洽信有非後人所能及者當南渡偏安之局倚小朝廷偷安喘息者比比皆是曾乃孤懷獨抱託諸歌詠以自攄其磊落激昂之氣雖觸忤時相重遭譴責有所不惜嗚乎如曾者可謂賢矣哉夫人不足論者其詩必不足傳若曾之爲人觀諸詩可以知其梗概第以爲存金陵之故事猶淺之乎讀是詩也已光緒二十九年癸卯日長至長沙葉德輝序

欽定四庫全書總目

金陵百詠一卷

浙江鮑士
恭家藏本

宋曾極撰極字景建臨川布衣晚以江湖集事得罪
謫道州卒所著春陵小雅今已不傳此乃其詠建康
故蹟之作皆七言絕句凡一百首詞旨悲壯有磊落
不羈之氣羅椅嘗謝其惠百詠書云不知景建是何
肺腑能辦此等惱人語於千載下今觀其詩如天門
山云高屋建瓴無計取二梁剛把當殺函新亭云江
右于今成樂土新亭垂淚亦無人大抵皆以南渡君
臣畫江自守無志中原而作其寓意頗爲深遠豫章
人物志載極遊金陵題行宮龍屏忤時相史彌遠以

提要

是獲譴是編有古龍屏風一首云乘雲遊霧過江東
繪事當年笑葉公可恨橫空千丈勢剪裁今入小屏
風與人物志所紀相合蓋其憤激之詞雖不無過於
徑直而淋漓感慨與劉過龍洲集中詩句氣格往往
相同固不徒以模山範水爲工者也劉壎隱居通議
摘其可惜當年殺嚴續無人爲益決囚燈二語謂續
始終全美未嘗被殺不免誤用故事考資治通鑑載
陳覺使周還矯世宗詔命李景殺嚴續景表請於周
明續無罪覺詐始露而續得免是續實未被殺壎所
駁良是究其致謬之由蓋以姚寬西溪叢話有鍾謨
奉使歸唐以陳覺矯周帝之命斬嚴續事言於唐主

云云所言不具首尾極遂以爲實有其事又決囚燈
事以中主誤爲後主亦爲乖舛是則考證之偶疏固
不必爲之諱矣

金陵百詠

宋 曾極 撰



金陵

楚威王以其地有王氣埋金鎮之故曰金陵或曰以其地接華陽金壇之陵

鑿地破除函谷帝埋金厭勝郢中王興亡總不關君事五百年前枉斷腸

攝山

在城東北四十五里有齊文惠太子鑿石鐫佛見存江乘地記村有草可以攝生故名陳軒有攝山十詠

詠一

一丈唐碑今露立千尋梵塔已低摧層層石佛雲閒出坐閱齊梁成劫灰

方山

葛玄煉丹之地

人間底事有方壺劍截青瑤界碧虛試上珠庭瞻醉葛仙雲垂帶護儲胥

覆舟山

在城北五里晉北郊壇宋藥園壘樂遊苑冰井甘露亭皆在此山

六代興亡貉一丘繁華夢逐水東流操蛇神

原注列子注山海之神皆

操蛇向山前笑三百年前幾度舟

樂官山

南唐初下時諸將置酒樂人大慟殺之聚瘞此山

故名

城破轅門宴賞頻伶倫執樂淚橫巾駢頭就戮緣家國愧
死南歸結綬人

天門山

在當塗西南三十里又名蛾眉山夾大江東曰博
望西曰梁山又號東西梁山李白銘有曰梁山博
望關扃楚濱夾據洪流實爲吳津兩坐錯落如鯨
張鱗惟海有石惟川有神牛渚怪物日圍車輪光
射島嶼氣凌星辰卷沙揚濤湧焉殺人國泰呈瑞

詠一

二

時訛返珍開則九江納錫閉則五嶽飛塵天險之
地無德匪親

鯨翻鰲負倚江潭天險由來客倦談高屋建瓴無計取二
梁剛把當穀函

西原

衰草寒雲雁一行牽愁水似九迴腸游人欲問千官事翁
仲無言臥夕陽

龍洞

在清涼寺前

江流遠引背煙嵐平陸何年重舉帆斷岸插天危欲墜六
朝龍去祗空巖

鍾山石

鍾山在上元縣東北十八里輿地志古曰金陵山縣名因此又名蔣山漢秣陵尉蔣子文討賊死事於此吳大帝爲立廟大帝祖諱鍾因改曰蔣山此山本無草木東晉時刺史還任者栽松三千株下至郡守各有差一名北山齊周顒隱於此此山有石脉理皆紅潤

戰血潛流石脉中蒼厓鑿斷見殷紅千年殺氣方回薄草木無春山盡童

梁金華宮石

輿地志云梁大同中所築昭明太子蔡妃所居在

詠一

三

清溪東石今在府治

照影清溪眩目奇推遷十代市朝非莫欺蘚眼蒼苔面曾伴昭明識蔡妃

大江

郡國志西北自六合縣界流入舊闊四十餘里昔魏文帝登廣陵觀兵戎卒數十萬旌旗數百里臨江見波濤洶涌歎曰吾武騎萬隊何所用之嗟乎此天所以限南北也

烽煙歲歲滿江干將帥誅求盍少寬未得三軍如挾纊憑誰數處護風寒

秦淮

在縣南三里始皇時望氣者言金陵有天子氣使
朱衣鑿山爲瀆以斷地脉改金陵爲秣陵晉陽秋
秦開故曰秦淮或云淮水發源屈曲不類人工
鑿斷山根役萬人祖龍癡絕更東巡石城幾度更新主羸
得淮流尙繫秦

玄武湖

在上元縣北十里宋元嘉閒有黑龍見故名今爲
後軍寨

當日湖光澈鏡心龍旗鳳吹此登臨而今鐵馬迴旋地斜
照黃塵一尺深

四太子河

詠一

四

上東門嘯本同科天誘金人智詐多刁斗夜鳴兵四合五
更平陸已成河

西浦

張碩遇杜蘭香處

珠璫錯落江皋佩羅襪輕盈洛浦妝欲採蘋花擲春信停
橈難覓杜蘭香

桃葉渡

一名南浦渡金陵覽古在秦淮口桃葉者晉王獻
之愛妾名也獻之詩云桃葉復桃葉渡江不用楫
但渡無所苦我自相迎接不用楫者謂橫波急也
獻之歌此送之

裙腰芳草抱長隄南浦年年怨別離水送橫波山斂翠一
如桃葉渡江時

采石渡

事見揮塵錄及楊文公談苑

石琢浮屠徧水濱興亡歲久已成塵長江靜夜蘆花月莫
信牽愁撥櫂人

五馬渡

晉元帝渡江童謠云五馬渡江一化龍識者謂吳
越之地當興王

仲達欺孤與操同豈能長世撫提封瑤圖暗換君知否班
特浮江自化龍

詠一

五

白鷺洲

丹陽記在江中心南邊新林浦西邊白鷺洲上多
白鷺故名

江水悠悠綠染衣淮山渺渺翠成圍南朝鷺序歸何處唯
見滄洲白鳥飛

黃天蕩

受金縱敵將何知曹沫功名失此時雁足不來貔虎散沙
頭蚌鷓謾相持

三十六陂

按王介甫有西太乙宮詩云楊柳鳴蜩綠暗荷花
落日紅酣三十六陂春水白頭想見江南

增注

渺然三十六陂春石黛潮生歲歲新楊柳杏花渾好在吟
邊只欠跨驢人

臙脂井

陳末後主與張麗華孔貴嬪投景陽井以避隋兵
舊傳云欄有石脉以帛拭之作胭脂痕一名胭脂
井又名辱井在法華寺或云白蓮閣下有小池面
方丈餘或云在保甯寺覽輝閣側

寒泉玉鬢沒春蕪石染胭脂潤不枯杏怨桃羞嬌欲墮猶
將紅淚洒黃奴

寶公井

在市心

詠一

六

一井當街百尺深行人環轍免苔侵塵容俗狀慙窺影欲
汲寒泉洗此心

木圍

寢殿重重設木圍崎嶇天位不勝危高人巢許應知此占
得箕山最坦夷

射殿

有七十閒旁多槐竹

鶴蓋陰陰覆苑牆更添蒼雪助清涼高皇儉德規模遠不

作南朝石步廊

李賀詩春熱張鶴蓋兔目宮槐小蘇子瞻竹詩蒼雪紛紛落夏簟丁公言詩因憶南

朝石步廊

行廊

負矢前驅敵未擒虎侯高揭意何深
文皇決拾精天下偏愛良工辨木心

古龍屏風

宣和舊物高宗攜之渡江後壞爛宮官惜之翦裁背成屏風立殿上

乘雲游霧過江東繪事當年笑葉公
可恨橫空千丈勢翦裁今入小屏風

新亭

在城南十五里金陵覽古在江甯縣十里洛陽四山圍伊洛漣澗在中建康亦四山圍秦淮直瀆在中故云風景不殊舉目有山河之異李白云山似

詠一

七

洛陽多許渾云只有青山似洛中謂此也蔡薳作天津橋亦以此

青山四合遶天津風景依然似洛濱
江左于今成樂土新亭垂淚亦無人

賞心亭

下臨秦淮盡觀覽之勝丁晉公謂建嘗以周昉所畫袁安臥雪圖張於屏後太守易去續志又云丁始典金陵陞辭之日眞宗出大幅表安臥雪圖付丁謂曰卿到金陵可選一絕景處張此圖謂遂張於賞心亭柱上有蘇子瞻題名猶存

柱上題名客姓蘇江山清絕冠吳都
六花飛舞凭闌處一

本天生臥雪圖

冶城樓

冶城即今天慶觀地本吳冶鑄之所晉元帝移於石頭城東唐德宗時浙江觀察使韓滉於建康石頭築五城曰石頭城曰冶城曰臺城曰苑城曰新城

裊裊疏林集晚鴉鍾山雲氣入簷牙何人乘月吹長笛夜看雲陵百萬家

南軒

在保甯寺方丈旁有小屋張魏公開督府時子讀書於此號南軒下有井土人指為建業水

詠一

八

劍磨驢膊倦征途三歲南軒客寓居建業水甘供日飲波閒亦有武昌魚

板橋

在城內

輪鞅千年路欲迷板橋名在市朝非元暉太白微吟處獨酌悠然命駕歸

高座寺

名永甯寺在城南門外或云晉朝法師竺道生所居因號高座寺蓋用劉禹錫詩中語

石子岡前高座寺犢車曾向此徘徊清談未解傾人國更引胡僧度海來

清涼寺

卽李王殿

秋月春花迹未陳
袞龍曾遠夢中身
夷門金鼓從天落
驚起床頭鼾麴人

同秦寺

在臺城內梁武帝窮竭帑藏造大佛閣七層爲天
火所災

布剎開齋涕泗揮
大通基在昔人非
此身終屬侯丞相
誰辦金錢贖帝歸

宋興寺

劉裕故居也

詠一

九

晉至昌明祚已終
讖文猶有兩昏童
桓玄偷得宮中璽
卻屬新洲伐荻翁

湘宮寺

事見通鑑

數椽敗屋湘宮寺
虞愿忠規正凜然
十級浮屠那復有
虛拋貼婦賣兒錢

鐵塔寺

元懿太子殯宮在焉

遊水無情去不回
黃簾窳地隔風埃
摩挲鐵塔堪流涕
此是先皇思子臺

寶公塔

六帝園陵墮劫灰獨餘靈骨葬崔嵬行人指點雲間鶴喚
得齊梁一夢回

長干塔

事見僧史

十丈祥光起相輪鐵浮屠鎮法王墳只愁西域神僧至夜
捧長干刹入雲

劉莎衣菴

金人入寇高宗召問之云沒事沒事兩家都換主
佛狸麾騎飲長江呼吸安危闔國忙南北兩家都換主從
容一語悟高皇

八功德水

詠一

十

在蔣山悟真菴後按梅摯亭記梁天監中有胡僧
曇隱寓錫於此山中乏水時有龐眉叟相謂曰予
山龍也知師渴飲措之無難俄而一沼沸成後有
西僧繼至云本域八池已失其一似竭彼盈此也
其泉一清二冷三香四柔五甘六淨七不饑八蠲
痼故名八功德水自梁以前嘗取給

數斛供廚替八珍穿松漱石瑩心神中涵百衲煙霞色不
染齊梁歌舞塵

後主祠

眞珠簾下變離聲多少嬌妃掩袂聽贏得牢愁三萬斛孤
舟撐入大梁城

荆公祠

霜筠雪竹古精藍投老歸與志自甘一食萬錢終忍垢魚羹飯美憶江南

文孝廟

德隱前星民已和山隈水曲廟何多皇孫不得承天統猶使而翁恨蠟鵝

謝玄廟

兒輩能軍國未危更令朱序助聲威秦人若也全師集雲母車盛晉鼎歸

蔣帝廟

白馬千年繫廟門爐煙浮動袞龍昏闔棺謾說榮枯定青

詠一

十一

骨猶當履至尊

吳大帝廟

在石頭城世代相傳廟基卽吳時故宮

曾將一劍定全吳斗大祠堂泣楚巫故國神遊應撫掌蘆花楓葉幾年無

晉元帝廟

茅茨綿蕝寄江東陵廟回看蹀血紅右衽危冠纔自保未能無責敢言功

中主像

據敖爲粥事見五代史

乘時草竊豈無人三主相傳事有因畢竟老天憐一念據

敖爲粥活飢民

謝公像

失喜向來因折屐含悲今日爲聞箏人閒悲喜何時攜
伎東山載酒行

大茅君像

面如頰玉碧矐寒散髮垂腰榭葉乾不向大茅峯頂見時
人多作伏羲看

吳大帝陵

老瞞虎裂橫中州何物生兒作仲謀四十帝中功第一壞
陵無主使人愁

荆公墓

詠一
十一
誤把清標犯世紛平生忠業自超羣如何今代麒麟閣只
道詩名合策勳

卞將軍墓

握節顏公拳透爪歸元先軫面如生晉陵發掘今無玉獨
有忠魂只冶城

張麗華墓

埋愁無地奈君何可是黃壚飲恨多玉鏡臺前棄脂水深
泉流汞尙盈科

華隱樓

卽陶隱居故宅

松聲聽罷獨看雲華隱樓中控鶴身治國神方難自獻祗

將本草語時人

華林園

羽葆來臨鼓吹停華林暢飲倒長瓶萬年天子瞢騰眼錯認長星作酒星

養種園

後主於宮中作紅羅亭賞紅梅韓熙載獻詞云桃李不須誇爛漫已輸了春風一半

百花堂裏賞芳菲江左羈臣淚濺衣腸斷上林桃李樹春風一半未全歸

潑墨池

在茅山費長房學道處圖經云石墨池蓋大小二

詠一

十三

西山藏異書見穆天子傳唐人穴石爲硯注道德經見隱逸傳

二酉珍儲已徧窺仙班甯宜列愚癡注經穴石須勤留作他年潑墨池

商廳館

卽九月臺也地產胭脂菊

商廳基在昔人非草木猶爲富貴移曾是六朝歌舞地黃花一半染胭脂

夢筆驛

晉尚清談筆力衰文章高下亦隨時景純不作文通死五色毛錐付與誰

蛇盤驛

枳籬華屋半雕殘
列肆屠羊客卸鞍
霸氣銷沈形影歇
龍盤何事作蛇盤

射雉場

不整軍容北射狐
卻資媒翳取歡娛
山梁飲啄關何事
浪費君王金僕姑

烏衣巷

在秦淮南去朱雀橋
不遠晉紀瞻立宅
烏衣巷王導自卜
烏衣巷王氏別族居
馬糞巷

吳兵曾住黑雲都
江左夷吾此卜居
休把烏衣輕馬巷
懸鶉結駟總邱墟

詠一

十四

鍾山番人窟

千羣鐵騎遠來侵
鑿穴鍾山用意深
天塹連空遮不斷
煙塵直到海中心

展上公

高辛時人居玉李溪

浩劫循環無始終
年年玉李杲春空
初成未占茲山頂
古老唯傳展上公

東晉

斷簡殘編迹可尋
諸賢興復不關心
未應全罪王夷甫
一任神州自陸沈

漁父

後主召一隱者問近曾作何詩云有漁父詩風雨
揭卻屋全家醉不知

智士旁觀當局迷滄浪釣叟出陳詩江頭風怒掀漁屋底
事全家醉不知

昇元閣鐸

昇元閣一名瓦棺閣乃梁朝建高二百四十尺李
白有日月隱簷楹之句今之昇元閣非古基矣石
柱二見屹立右軍教場中

摩挲石柱蘚痕斑亡國如鴻去不還無復切雲三百尺祇
傳風鐸在人閒

孫陵鷺眼錢

詠一

十五

六代初終幾變遷孫陵無樹起寒煙青蚨細薄如榆莢猶
是當年買笑錢

澄心堂

王直方詩話澄心堂紙江南李後主所製劉貢父
詩當時百金售一幅澄心堂中千萬軸

楮生玉面霧深藏未肯橫陳翰墨場一幅降牋何用買價
高緣寫宋文章

德慶堂字

李王所書南唐但餘此物李王筆法有鐵鉤鎖
森然筆勢聚千將氣軋鍾王未肯降惆悵當年鐵鉤鎖可
能無意鎖長江

南唐金銅香爐

製作元從建業宮形模奇古雜金銅煙昏塵暗君休笑曾
在紅羅扇影中

南唐宮中殘獐

南唐宮中忽得殘獐一枚陳陶云是夜狼星上直
周廬巡徼列千兵那得殘獐墮禁庭鹿走棘生先有象天
文未必直狼星

南唐遣使

談鋒亶亶折強鄰專對當年亦有人國老胸中兵百萬不
將全力靠江神

玉樹後庭花

結綺臨春成草莽繁華都入暮煙中後庭玉樹迎秋色猶
帶張妃臉上紅

三段石

上元縣南三十里有段石岡丹陽記云有大碣石
長二丈折爲三段紀吳功德其文東觀令華嚴作
其字大篆或又云皇象書也今移在府中

凜然皇象法書存重屋應無野火焚割據英雄餘一念斷
碑千載尙三分

沒字碑

漫漫荒池浸綠蕪殘碑一丈載龜趺當年刻畫書勳閔雨
打風吹字已無

校官碑

在溧陽縣官廨

風摧雨剝校官碑集古先生竟不知同是光和千歲刻未
容苦縣獨稱奇

石麒麟

地名

短樊長塹起寒煙知是何人古墓田千載石麟相對立肘
驥膊焰故依然

石步道中有石麒麟數十

地悴天荒邱隴平難從野老問衰興蒼煙落日低迷處折
足麒麟記壞陵

詠一

十七

水精大珠

眞廟所賜照物皆倒又物影沈在上下段無影
冰玉摩尼如鵝卵大千世界倒懸中何人提向江頭照照
見神州一半空

輜車

姪姪吳音今古同宮粧袷服已成空雕文結角輜車巧猶
有梁陳宮掖風

決囚燈

後主決死囚燃佛燈決之囚家賂左右竊益膏輒
得不死

五詳三覆始施刑明滅蘭膏豈足憑可惜當年殺嚴續無

人爲益決囚燈

江南錄

事見荆公集

自古櫻鱗或似狂按誅潘佑事堪傷憑誰寄語徐常侍不
殺忠臣國未亡

蜀海棠

傳芳遠遠自西鄰錦傘高張熨眼新花睡覺來紅淚落年
年如憶故宮春

鳳州柳

鳳州柳蜀主與江南結婚求得其種鳳州出手柳
酒

詠一

十九

蜀主函封遣使時芳根元自鳳州移柔荑醞醪今安在唯
有青絲拂地垂

南燭草木

駐采還年枉費功羞將老色照青銅仙方石餽無消息南
燭垂珠顆顆紅

榎櫨

形如木瓜熟時金黃陶弘景五和糝中用之

子丹進饌色微黃仙老調膈有禁方五和糝奇無處覓榎
櫨新熟壓枝香

青松路

王介甫手種松

致君堯舜事何難投老鍾山賦考槃愁殺天津橋上客杜
鵑聲裏兩眉攢

詠一

十九

嘉禾百詠

于廷榮署

光緒癸卯冬

長沙葉氏刊

欽定四庫全書總目

嘉禾百詠一卷

浙江鮑士恭家藏本

宋張堯同撰堯同秀水人仕履未詳詩中所詠會景亭爲潘師旦所築趙老園爲趙袞歸隱之處核其時代蓋寧宗以後人也宋世文人學士歌詠其土風之勝者往往以誇多鬪靡爲工如阮閱郴江百詠許尙華亭百詠曾極金陵百詠皆以百首爲率故堯同所詠嘉興山川古迹亦以百篇槩之徐碩至元嘉禾志已與陸蒙所賦嘉禾八詠同採入題詠門內後來作郡志者亦頗散見其間而掇拾均未全備此乃其初出單行之本每首之後皆有附考不知何人所作末

序

有跋語亦不載姓名年月其詞雖不甚工而自吳越以來嘉興典故頗可得其梗概近時朱彝尊作鴛鴦湖權歌一百首蓋卽踵前例而稍變其面目者雖彝尊詩情溫麗遠勝堯同而堯同採掇名目臚敘大凡其於地志考據要亦不爲無助矣

嘉禾百詠

宋秀州 張堯同撰

胥山

馬革浮屍去君王太忍人此山空廟貌何以勸忠臣

附考山在郡東二十五里接嘉善縣境一名張山乃硤石之餘支也吾郡諸山自天目發源盡於海鹽北一支由硤石蜿蜒而來發爲胥山平田突兀廣尋數畝舊經云子胥伐越駐兵於此水經云子胥死浮屍至此居民憐之立祠其上俗名伍王廟旁有石龜凝望注水風雨中農人見其行疑爲怪鑿其目碑語有石棧自錢塘抵禦兒之胥口凡十一字惜不得其全文又有磨劒石長

詠

二丈許劍痕在焉其巔相傳卽子胥墓也括異志云隆興間守臣李春請撥隸郡學以荒山皆石不果鄉人陳了翁之裔陳燿鑿石結廬名讀書堂下有水曰胥江屠應垓有胥山賦其地題詠甚衆八景之一曰胥山松濤
胥山

丹竈功成後寥寥掩竹扉但聞蟬已蛻不見鶴來歸

附考山在府城西南五十七里舊屬嘉興今析屬桐鄉縣東南三十五里千金鄉昔有道士爻基尸解於此唯存中斃葬之號桐棺塚山有兩峯東峯號史山明初貝清江朱以貞結爻山詩社後郭觀察舜舉吳洪雅公治西林僧公朗輩繼其盛云又有洗藥井藏兵塢潮音院

顯靈廟係宋時祀三衢周孝子封顯靈王者慈烏泉碣石岳陶弘景真誥云嘉興父季真於宋景和元年得晉楊許三真手蹟於剡縣馬氏以呈廢帝又陶隱居弟子題名有嘉興父興祖

漉湖

四境田相接煙瀾自渺瀾客來吟此景無或比漉池

附考湖在郡城東南二里春波門外一名馬場湖宋志云濶五百丈深三丈北鄰城壕東列塵市其西則鴛湖也亦名南湖湖濱有濠股塔湖南有樂郊水心列岫三亭及潘尚書園中有煙雨樓俱另見

鴛鴦湖

詠

東西兩湖水相並比鴛鴦湖裏鴛鴦鳥雙雙錦翼長

附考湖在郡城南三里澄海門外湖中多鴛鴦故名又云以東西兩湖相麗如鴛鴦也亦曰雙湖總名南湖宋從事郎聞人滋南湖草堂記云樵李澤國也東南皆陂湖而南湖尤大計百有二十頃元陳世昌有南湖賦湖中有裴島放鶴洲諸勝又名陸瑁養魚池八景之一曰鴛湖春曉

長水

古來名未滅人好水還清一讀高僧疏塵勞悟此生

附考水在郡城南六里長五十餘里自海寧發源貫硤石東北流入嘉興境始皇東遊過此聞土人水市之謠

乃乘舟交易以應之宋時有長水法師明沈懋孝學者稱長水先生

谷水

一作許尚詩

短棹經行處風披藻荇香中宵孤鶴唳片月在滄浪

附考舊經云古戰場夾谷口秦長水縣治今谷水是也神異傳曰由拳縣卽秦長水縣淪陷爲谷因名谷水東南流逕嘉興縣城西又東南逕鹽官縣故城南水經注引吳記曰谷水出吳小湖逕由拳縣故城下九州志云谷水之右有馬罌城吳王濞煮海爲鹽於此梁元帝玄覽賦曰時度谷水之陽尙想嘉禾之方壯慶亭於吳后雄構李於越王陸機對晉武云三泖冬溫夏涼谷水在

詠

三

其北金澤章練小蒸大蒸白牛諸塘在其西葑澳走馬諸塘在其東泖橋之外橫絕東渚者秀州塘也又吳地記云海鹽縣東北二百里爲長谷陸遜陸凱居此又云嘉興縣東二十五里有長谷亭方輿勝覽云陸遜所封名華亭谷嘉禾志云當湖北有華亭河然則一水異名大抵自硤石襟帶吾禾數邑以至於泖耳

天星河

拍岸浮春漾菰蒲四遠生網羅人不到魚鳥亦忘情

附考河在郡城內東北一名天心河宋嘉禾志云東西廣三十四丈卽始皇發徒所掘俗謂天星墜穴泉與海通故大旱不涸水草不生旁有碑存二十餘字剝蝕不

可讀

穆溪

靜練明田外源流笠澤通不因逢歲旱誰識濟時功

附考溪在郡城東北四里接上谷湖入太湖水中多龍骨

非溪

終與雙溪接分流入郭來市橋人影合不解洗塵埃

附考溪在郡城內卽南湖之支流經城而達於北運河川瀆記云太湖東通嘉興非溪是也溪上有西涎里見搜神記

雙溪

詠

四

柔櫓聲相應名齊漢魏收可憐一溪水分作兩塘流

附考溪在郡城東六里以其近漢塘魏塘故名漢塘入平湖魏塘入嘉善俱可由此以達松江

秀水

好景明於畫長浮五色波一竿吾欲釣來此聽漁歌

附考水在郡城北麗橋之東相傳水浮五色見者獲慶亦稱繡水明析邑名因此

白龍潭

呼吸風雲合飛潛自有時只愁潭水淺頭角被人窺

附考潭在郡城西南四里通越門外景德寺旁有白虎穴風濤溺舟作三塔鎮之今析屬秀水境八景之一曰

龍潭暮雲

禦兒

用此臨吳戰何人爲越謀夫差曾不寤亡國始知羞

附考水在郡西南去崇德縣治東南一里舊名禦兒中
涇俗名沙渚塘吳越時棲兵於此越語勾踐之地北至
禦兒左傳吳越春秋皆作禦史記年表作禦西漢易爲
語而年表又作菡水經曰由拳西鄉有產兒便能語因
詔爲語兒鄉元豐中朱長文續吳郡圖經云范蠡獻西
施於吳道中生子至此能語張宮諭廣皇輿考亦云又
越絕書曰語兒鄉故越界大夫種曰吾以禦兒臨之又
女陽亭者勾踐入官於吳大夫產女此亭養於李鄉勾
踐勝吳更名女陽三朝國史云有語兒亭又名女兒亭
俗呼因兒墩漢元封初封轅終古爲禦兒侯

范蠡湖

少伯曾居此螺紋吐綵絲一奩秋鏡好猶可照西施

附考湖在郡城內西南金明寺旁中產異螺五綵相傳
范蠡曾隱於此有陶朱公里四字碑又有西施妝臺

梧桐涇

落落梧桐樹何年作鳳鳴試看千古翠流盡一溪聲

附考涇舊屬郡境後析桐鄉縣名因之在邑之東卽濮
川所通處也五代時鳳鳴其樹邑人蔡孟熙繪圖廬陵
周忱爲記

汾湖

我是滄浪叟聞來繫釣艫如何一湖水半秀半吳江

附考湖舊屬郡境後析嘉善在縣西北三十六里其半爲吳江地故名分湖後人加水爲汾耳中產巨蟹陶振有賦楊惟楨有記

柘湖

神居陰陽護尋國捍洪波莫慮蛟龍怒年來畏叱呵

附考湖舊屬郡境卽海鹽舊治淪陷者也今在平湖縣華亭鄉與嘉善接境東界華亭今無復有湖凡張堰亭林黃茅白葦之墟皆是也多生柘樹故山名柘山林名柘林柘一作橐初陷時有女子入湖爲三姑神土人祠

詠

六

之

馬塘堰

疑著風波惡民謠亦畏人築塘成堰後斬馬祭河神

附考堰在郡城南七里九域志云始皇至此過水爲堰斬馬祭之屬嘉興

杉青堰

舊吏家何在空尋古柳隄世情今亦爾莫笑買臣妻

附考堰在郡城東北四里其旁有閘寰宇記謂朱買臣妻改嫁杉青閘吏北一里有死亭灣爲妻死處又有落帆亭宋秀王諸公送鄉人陳確持節江東留題亭北今析屬秀水八景之一曰杉閘奔湍

鳳凰洲

竹秀水色淨忽來雙鳳凰岐周昔鳴瑞今復見文王

附考洲在郡城東七里宋隆興元年有五色鳥飲啄其上故名屬嘉興

龍舌頭

一吸長川靜煙雲忽有無誰看領底月誤欲探驪珠

附考在郡城東七里卽雙溪之背也今名會龍山屬嘉興

月壕

入徑深於塢滄波近馬蹄每逢蓮社友咫尺走東西

附考壕在郡城西其水抱城灣曲如月故名亦曰月河

詠

七

屬秀水

靈光井

玉贄祥光發難藏世上名定多慈護力一飲百疴輕

附考井在郡城內精嚴寺本晉徐熙之別業因夜發光捨爲寺成帝賜名靈光

幽瀾泉

神女鍾靈處眞堪療渴羌滿巽秋玉色一酌灑清涼

附考泉在景德寺中舊屬郡境後析嘉善去縣東一里相傳有僧見一女子厲聲曰窗外誰家女應曰堂中何處僧逐之忽隱掘得石刻有幽瀾二字石下得泉大旱不涸煮茶無滓盛暑經宿而味不變邑人盛唐有記八

景之一曰武水幽瀾寺係唐天寶開創又有大悲閣雨
花臺翻經室洗鉢池補衲亭蘿屋月竹爐煙諸勝

檣李城

螳螂方捕楚黃雀遽乘吳交怨終忘國君王到死愚

附考城在郡城西南四十五里春秋時越敗吳於檣李
因其地產佳李故名越絕書作就李公羊傳作醉里史
記載吳王闔閭傷指卒於涇去檣李七里夫差敗越於
夫椒報檣李也又曰西施醉於此卽今濮院析屬桐鄉
射襄城

此地連江海曾經古戰爭干戈今不見空有射襄名

附考城在郡城東北三十里吳王禦越之所一名聞川

詠

八

今名王江涇又東三里爲聞家湖宋聞人氏家焉宋武
節將軍聞人宣扈蹕南遷定家於此其玄孫恂爲進義
校尉死厓山之難

四城

吳越爭雄日區區在用兵空餘爭戰地無處不高城

附考東顧城西新城南子城北主城皆在郡境吳築以
禦越

何城

報越心雖壯貪齊計已輕忠言殊不聽何用築斯城

附考郡西有何城在崇德縣西三里又有萱城在崇德
縣東三十里晏城屬桐鄉管城屬鹽官皆春秋時築此

四城屬越境

由拳故城

故城人不見擊劍淚空霑一絕悲聲遠今猶說孝廉

附考在郡城南搜神記曰始皇東巡望氣者云五百年後江東有天子氣始皇至令囚徒十萬餘人掘汚其地鑿審山爲硤北迤六十里至天星河止表以惡名曰由拳言囚倦也今春波門外合五水俗訛油潭

嘉禾墩

寂寞黃龍後紛然壠上碑廢興無處問空詠草離離

附考墩在郡城東北四里卽吳時生嘉禾之地

古戰場

詠

九

自昔干戈地城空草自荒漁樵懷舊事何敢議興亾

附考在郡南四十五里舊經云古戰場夾谷口卽秦長水縣治也又名吳越戰場其大者曰東蕩界桐溪鹽官閒西蕩崇桐相半皆廣數十里土人墾地往往得敗甲朽鏃云

村門口

昔日荒閒地今聞市井喧人情看促迫無復似當年

附考未詳

宣公橋

祇因裴少保功業敗垂成往往橋邊客今猶恨未平

附考橋在郡城東春波門外相傳爲宣公建屬嘉興

五柳橋

爲懷陶靖節無復見其人誰種橋邊柳猶含舊日春
附考橋在嘉興治西俗名慶豐橋

百步橋

舊址依然在荒墟未百年還分一橋水流入幾家田
附考橋在杉青堰旁

跨塘橋

路接張涇近塘連谷水長一聲清鶴唳片月在滄浪
附考橋在嘉善縣西北舊屬郡境

菩薩橋

片雲初出岫南北白飛揚舊日橋邊路猶聞鳥履香

詠

十

附考橋在秀水縣治東

竹橋

腰枕政亭北橫斜古渡頭風吹雙淚落恨逐水東流

附考橋在秀水

河內亭

掾死緣非命兒來哭未休舊時亭下淚疑與水長流
附考亭在郡城西漢張武父爲郡掾送太守妻還河內
爲盜所殺武哭於此

嘉禾亭

五馬來何暮經營指一彈石碑書近事留與後人看
附考亭在府子城內西有嘉禾金風二亭東有清風亭

北有利川觀風野泉朝宗四亭又有序賓亭皆宋知州張瑜建

列岫亭

吾州風物好惟是欠青山忽有洞庭色來從一笑間

附考以下三亭俱在澎湖之南

水心亭

波光磨不盡鏡面絕纖塵照得紅亭子亭亭似美人

樂郊亭

竹下清風好時來挂幅巾待逢田叟問知是樂郊人

會景亭

有景道不出須來此水濱十分花鳥色團作一亭春

詠

十一

附考宋尙書潘師旦園在澎湖濱中有南塢海棠亭白蓮沼桃花亭紅薇逕茶溪仙鶴亭芙蓉塘白苧橋漁漱十景咸會於此故名園舊屬柳氏師旦知秀州重築趙孟頫有記

南塢

岸回波曲曲城轉草層層忽見桃花落還如到武陵

海棠亭

蘇砌逢煙渚花開忽滿株春風吹爛熳如展蜀川圖

白蓮沼

滄波圍四面豔豔玉開花自可除簾幙清香不用遮

桃花亭

不待東風折池塘已自春試看原上客猶恐是秦人
紅薇逕

漸放秋風晚花無爛熳香淺深紅似錦散影在滄浪

茶溪

茶林那復有零落付樵人舊日溪邊叟空悲二月春

仙鶴亭

杳杳雲閒路重重隔翠林數聲清夜後來伴月邊吟

芙蓉塘

一發連千丈紅雲出素波秋風吹欲老無奈落花何

白苧橋

徧隴敷青綠桑林共幾家滿城羅綺子應笑不栽花

詠

十一

漁漁

野水連天闊滄波引釣緡寄言溪上叟莫學直鉤人

懷蘇亭

猶使樽前客常懷沒後名好風吹遠籟如有笑歌聲

附考亭在府治東子城上宋建與蘇小墓相望故名後

改曰朝陽樓

披雲閣

茲樓當勝地高望極峻嶒欲覩青天色還須上一層

附考閣與懷蘇亭相近宋知州方滋建後改名風月無

邊樓

景龍樓

千秋傳異綵百尺護雕闌欲識金龍瑞丹霄試仰看
附考樓卽東塔寺東廡鐘樓也宋孝宗父子偁調爲嘉
興縣丞生孝宗幼時登樓墮地左右失色孝宗屹然不
動寺僧先夕夢金龍挂于樓角因名事詳揮塵錄

煙雨樓

妙手誰烘染梳煙沐雨姿一聲長笛晚人在倚樓時

附考樓舊在郡城東南滌湖之濱五代時吳越王錢元
璪建宋嘉定中主希呂重修元季毀明嘉靖閒知府趙
瀛濬內隍淤土移填湖中構樓五楹兵憲沈燧復闢其
後爲釣鰲磯遂爲南湖之勝又名疑樓八景之一曰春
波煙雨

詠

三

月波樓

天澗冰壺淨溪平玉鑑寒卷簾看曉色鷗鳥並闌干

附考樓在郡西北城上宋元祐中知州令狐挺建政和
中毛滂重修有記下瞰金魚池唐刺史丁廷贊養金鯽
於此又張能臣名酒記曰月波秀州酒名又宋詞吹笛
月波樓下有何人知得八景之一曰月波秋霽

眞如院

田家輕脫屣聊結淨人緣影外香燈寂清風百世傳

附考院在郡城南四里屬秀水唐至德中裴休捨宅爲
至德院雪峯和尚結庵其中宋改眞如院明洪武時定
爲教寺今仍之內有雪峯井長水塔裴相清輝堂綵雲

橋柏屏龍槐石梅纓絡松東坡煇茶亭諸景司馬光有
記

雪峯庵

一語合頭悟師承豈在身戲言廬墓客未是報恩人

景德禪院

白毫光未滅勝事百年中好是傳燈地林泉有古風

附考院在郡城西去秀水治三里宋建炎中建初寺基
下有白龍潭多風濤晴霽時有白光三道僧行雲積土
填之造三塔東坡過此畫竹於壁與季甲俱有詩另見

三壘

石匱埋神物靈光照夜多龍歸天上後無復更風波

詠

西

學繡塔

孤塔岿立猶傳學繡人五湖如好在針線不勝春
附考塔在三塔西二里相傳西施入吳學繡於此

水陸院

白晝重門寂蒼苔古殿深老僧香火罷松柏夜森森
附考院在郡治西北一里晉興寧間哀帝詔剡山法師
竺潛講般若於禁中還止樵李貴人家因捨宅爲寺梁
天監中盛行水陸法事號水陸院宋賜名祥符

泗州庵

舊寺丘墟後重興歲月賒莫將閒禍福容易託僧伽
附考卽今東塔寺在郡城東六里漢朱買臣故宅也梁

天監中建隋仁壽閒置塔宋元豐時賜名泗洲大聖塔
院政和六年名壽聖教院孝宗以潛邸改賜東塔廣福
教院明洪武中定爲今額內有景龍樓青白二池聽玉
軒朱買臣墓

雲門家舍

滿篋藏鋒句家傳世幾何遠孫無悟解卻笑葛藤多

附考雲門大師係嘉興人詳方外

白蓮上方

古屋深於洞門前種白蓮好尋當日社重結此生緣

附考寺在郡城東八里舊名接待院後廢爲趙倅雋之
錦莊宋紹興二年重建洪武初定爲講寺元季劉伯溫

詠

五

館於其中

普濟院

祇應曾布地往往化爲魚一遇丁千騎禪人便結廬

附考院在秀水

兜率寺

昔年池滿地今見屋眈眈不結蓮花界龜魚死未甘

附考寺在秀水

姜庵

不入紅塵市安居三十年至今庵下路芳草碧芊芊

附考庵在秀水

惠明堂

地僻無人到松風鶴夢清一燈禪榻畔自向暗中明
附考堂在嘉興

三過堂

題詩三過此坡老昔時曾悟得成彈指未爲打睡僧

附考堂在郡城西二十七里本覺寺中屬秀水舊名報
本禪院宣和中改爲神霄玉清萬壽宮淳祐間請爲本
覺禪院蘇軾與文長老善守杭之明年有事於潤一過
題詩後六年自徐移湖再過則長老退院又十年除龍
圖學士知杭州三過則長老已卒皆有詩後人因建堂
內有橋李亭空翠亭四圍竹十餘畝八景之一曰空翠
風煙俱另見

詠

寂照庵

寂滅跏趺地燈光照四時高僧穿地脉此意少人知

附考庵舊屬郡境後析桐鄉在縣東南二十里千金鄉
屠甸邨晉天福八年建名報恩寺宋治平間改寂照院
相傳二石佛海中浮至寺西有石人涇寺僧溫日觀善
畫蒲萄

天慶觀

寥陽龍已化華表鶴空悲欲問梁朝事惟應老檜知

附考觀在府治西北二里有七賢遺迹一嚴陵燭焰二
蹇子虔山水三葛洪書額四吳道子貌真五張僧繇鷹
六顧虎頭神七飛仙又有唐開元鐘梁朝檜七寶上帝

像宋推官解九皋井銘今觀址改建城隍廟

福順廟

老屋無丹雘空階只翠苔遠擔看箭鏃誰記赤眉來

附考廟在嘉興治西南五里唐咸通中建祀隋司徒陳杲仁封忠烈公

昌武廟

祇因吳士季千載仰公神欲借驅疔術來臨刻木人

附考廟舊屬郡境後析桐鄉在皂林鎮吳士季爲吳興令疔疔遣人就此乞驅鬼遂夢一騎縛小鬼去卽愈宋志淮海王有三子皆有功於民因祀爲土穀神皂林爲大龍翔爲二爐鎮爲三云

詠

十七

楊姑廟

孝德襄陵久天然與眾殊生男不能養應合愧楊姑

附考廟在嘉興縣西宋楊孝女躬耕養親鄉人祠之

徐偃王廟

王有岐夷德千年貌亦存我懷三刺史誰是後來孫

附考廟在郡西北三十里偃王逃之會稽遺廟在焉旁有墳屬秀水

曹史君祠

一笑淮兵卻功成未易論豈慚顏刺史詩酒在平原

附考祠在府治西北祀吳越時牧守曹信及其子珪爲嘉興都將守城以拒淮人民懷其德立祠祀之

高史君祠

一瞑移藩日邦人昔被恩步兵碑尙在功業敢經綸
附考祠在嘉興治北三十六里嘉善治西北十里史君
逸其名晉建武中爲嘉興監屯校尉鎮靜其民終於此
立祠祀之梁步兵校尉劉績之爲記

寥陽殿

人歸天上去空識舊衣冠祕錄藏金匱清風滿殿寒
附考殿在秀水有葛洪書碑後爲郡幕解九皋取去

霍將軍廟

弼漢功非淺讒夫可柰何海神今亦畏安敢布風波
附考廟在郡城東南二十七里石佛寺旁祀漢霍光三

詠

十八

吳濱海皆有祠又平湖亦有廟另見題詠

讀書堆

一作唐詢詩

平林標大道曾是野王居住事將誰語淒涼六代餘

附考嘉興縣東六里有顧節墩平湖東泖上有顧書堵
俱野王讀書處也野王店在顧亭林舊屬海鹽境後晉
天福庚子亭林寶雲寺壞於水僧夢二青衣來云梁持
節至俄一人紫衣金魚儀狀秀整曰此吾故宅汝建寺
立像吾當護之有水際古碑可據也明日獲碑字皆磨
滅惟存數字云寺南高基顧野王曾於此修輿地志云

簡齋

詩老追唐句閒居築簡齋芙蓉寒浦外紅落感秋懷

附考齋爲陳與義所築舊屬郡境後析桐鄉在青鎮廣福院芙蓉浦上又有南軒三友亭諸勝後趙子昂作古篆題曰簡齋讀書處

陳賢良隱居

發策名猶在回頭事已非池塘春草綠空憶謝公歸

附考嘉興治東北二里爲舜俞宅崇寧三年其孫捨基爲漏澤寺其隱居在清風涇析屬嘉善卽宋史所載白牛邨別業也

徐長者園

丹砂猶未就白髮忽成翁卻有憐春意栽花向此中

附考園在嘉興長者宋人學道年八十治圃栽花老於

此

詠

十九

趙老園

藏書幾萬卷歸老此林泉不爲尋蓴鱸于公亦有賢

附考園在郡城西三里景德寺後析屬秀水乃宋致政殿丞趙公歸隱藏書之處公名衮字希甫陳舜俞題曰趙老園

施墓

蒼苔侵壞道晚雀散空林莫問人賢否浮生一古今

附考墓在嘉興治東二十里圖經云齊長沙王府長史施修琳墓

衛墓

惆悵黎陽客飄流浙水濱定忘空腹恨知是赤心人

附考墓在嘉興治西南圖經云衛大夫洪演墓也衛懿公爲狄人所滅食其肉惟肝在地演剖己腹而內焉

劉伶墓

荷鍤從吾後叮嚀死便埋人皆譏嗜酒我獨愛忘懷

附考墓在府城東二十七里胥山下俗呼金伶墓蓋避吳越王諱也屬嘉興又胥山有荷鍤翁墓

嚴忌墓

有子如君少終緣叛國亾冢前無後嗣切勿怨張湯

附考墓在郡城西北二十七里新城鎮屬秀水子助葬由拳在天寧寺後俗呼後嚴墩蓋以忌爲前嚴助爲後

詠

三

嚴也

朱買臣墓

世事春風轉榮枯一夢間繡衣人不見孤冢舊家山

附考墓在郡城東三里東塔寺中

周都官墓

不識君名字應難問子孫一丘浮水際神怪欲誰論

附考墓在秀水治西北水中旱不加高潦不加沒今尙存

蘇小小墓

泉下骨應朽幽魂獨未消幾番清夜月孤影度南橋

附考墓在嘉興治西南六十步有片石在通判廳曰蘇

小小墓南有賢娼巷寰宇記云墓高三丈有大井在其側舊生雙桃於上方輿勝覽亦云

羞墓

傷哉負薪子五十始登朝空使埋羞處山光復採樵

附考墓在郡城北十八里買臣妻葬處又曰羞涇又作

楸涇

木紋觀音

雙瞳分日月眉際一星懸照見人間苦二辰不在天

附考唐咸通閒郡中有木在水際每遇淨則浮逢羶則沉人知其異取鑄觀音像纔畢面目手指皆有光彩人稱木紋觀音又作目紋初在五臺院後以兵火移精嚴

詠

三

寺東廡紹興十一年邦人禱賜重新其宇先是郡守曾侯曾夢白衣人曰我當此方致雨奈面目不淨三十里無所見不能與眾聖會明日詰之果匠者用雞子牛膠調粉故爾遂改新之乃應

邦藥王龕

父老懷遺愛誰傳肘後方藥囊同日葬空憶紫元香

附考在嘉興

淨相佳李

地重因名果如分沆瀣漿傷心吳越戰未敢盡情嘗

附考淨相寺在郡城東南三十六里梁武時建地產佳李構李之名由此

符姥瑞竹

一幅霜縑外青青出自然天機何敢議珍重白衣仙

附考在郡城

詠

三

